

Inatsisartut suleriaasianni § 37, imm. 1 naapertorlugu, matumuuna Naalakkersuisunut imaattunik apeqquiteqarpunga:

Naalakkersuisunut apeqqutit:

1. Naalakkersuisut ilisimavaat massakkut Islandimiittoq assartugassat annertussusaat 2–3 Twin Otter-it imarisinnaasaattut annertutigisoq, Nerlerit Inaanut nassiunneqarnissaminik utaqqisoq?
2. Naalakkersuisut uppersarsinnaavaat Norlandair-ip ilaasussat tamakkerlugit inniminniisoqarsimaneranik tunngavilersuutigalugu assartugassanik tigusinaveersaartoq?
3. Naalakkersuisut akuersaarpaat Nerlerit Inaanut aammalu Ittoqqortoormiit-mut allakkat aammalu pingaarutilinnik taartaasartussat nassiussassat Islandimut apuussereersimagaluarlutik ullut 30-it sinnerlugit tunniunneqanngitsoortarnerat?
4. Nerlerit Inaanut aammalu Ittoqqortoormiit-mut allakkanik, pingaarutilinnik taartaasartussanik aammalu pilersuinermt atortussanik assartuineq pillugu isumaqatigiissutitut tunngasut suut atuuppat?
5. Naalakkersuisut suut piaarnerpaamik iliuuseqarfiginiarpaat:
 - a. katersuussimasunik assartugassanik ingerlaqqittumik assartuineq qulakkeerniarlugu,
 - b. mittarfiup aputaajaasarnermut atortuinit taartaasartussat apuunnissaat qulakkeerniarlugu,
 - c. innaallagissiornerup atortuinit taartaasartussat amigaataanerisa kingunerisinnaasaannik ingerlatsinerup uninneranik imaluunniit sulisut qimagutsinneqarnissaannik pinngitsoortitsiniarluni?
6. Naalakkersuisut ingerlatsisoq piumaffiginiarpaat piffissani ulapaarfiusuni immikkut ittumik assartugassanik timmisartuussinernik pilersitsinissaanut?
7. Naalakkersuisut naliliipput massakkut angallannermut aaqqissuussineq Ittoqqortoormiit-mut pilersuinermt isumannaatsumik qulakkeerinninnersoq, imaluunniit aaqqissuussinermik allannguinnissaq pisariaqartutut isigineqarpa?

(Inatsisartunut ilaasortaq Jens NapātôK', Naleraq)

Tunngavilersuutit:

Greenland Airports-ip ulloq 2. marts 2026 Nerlerit Inaat pillugu allakkiaani erserpoq Islandimi allakkanik aammalu assartugassanik annertooujussuarmik katersuussisoqarsimasoq, Nerlerit Inaanut tassanngalu Ittoqqortoormiit-mut ingerlaqqittussanik.

Allakkiaq naapertorlugu katersuussineq 2-3 Twin Otter-it imarisinnaasaattut annertutigaaq. Aamma paasissutissiisutigineqarpoq Norlandair-ip ilaasussat tamakkerlugit inniminniisoqarsimanera tunngavigalugu assartugassanik tigusinngitsoortartoq, tamatumalu kingunerisaanik kinguaattoornerit annertunerulersartut. Nassiussat ilaat Islandimut apuukkaluarlutik ullut 30-it sinnerlugit tunniunneqanngitsoortarput.

Pissutsit kinguneraat:

- Neqinik nerisassanik nutaanik pilersuineq ajornakusoortinneqartoq.
- Mittarfiup aputaajaasarnermut atortuinut pingaarutilinnik kingoraartissat kinguaattoornerat, mittarfiup ingerlatsineranut sunniuteqarsinnaasoq.
- Innaallagissiornerup atortuinut kingoraartissat amigaataanerat, ajornerpaamik innaallagissiornerup kipineranik aammalu sulisut qimagutsinneqarnissaannik kinguneqarsinnaasoq.
- Ittoqqortoormiini suliffeqarfiit aammalu innuttaasut piffissaq ilisimaneqanngitsoq utaqqisariaqartarnerannik eqqugaasut.

Taanna nuna immikkoortuuvoq allatigut angallavissaqanngitsoq. Taamaattumik pilersuineq tamakkerluni silaannakkut angallannermut aaqqissuussinermut attuumassuteqarpoq. Pingaarutilinnik kingoraartissat aammalu inuiaqatigiinnut pingaarutilinnik pilersuinnermut atortussat siulliunneqanngippata apeqqutaalersarpoq aaqqissuussineq massakkut atuuttoq Naalakkersuisut akisussaaffigisaanik - tassalu ataatsimoortitsinermik, naligiissitsinermik aammalu nunap tamakkerlugu ingerlatsinerup isumannaatsuunissaanik - naammassinnissinnaanersoq. Taamaattumik Naalakkersuisut tamanna pillugu erseqqissumik naliliinissaat aammalu nassuiaateqarnissaat kissaatigineqarpoq.

Apeqqutigineqartut ullut suliffiusut qulit (10) iluanni allakkatigut akineqareersimanissaat piumasarineqarpoq. Oqaatsinik nutserisimanermi paatsuungasoqassatillugu kalaallisut allassimasoq aallaavigineqassaaq.